

D.R. 13/2010

RANG UNDANG-UNDANG

b e r n a m a

Suatu Akta untuk meminda Akta Jualan Langsung 1993.

[]

DIPERBUAT oleh Parlimen Malaysia seperti yang berikut:

Tajuk ringkas dan permulaan kuat kuasa

1. (1) Akta ini bolehlah dinamakan Akta Jualan Langsung (Pindaan) 2010.

(2) Akta ini mula berkuat kuasa pada tarikh yang ditetapkan oleh Menteri melalui pemberitahuan dalam *Warta*.

Pindaan tajuk panjang

2. Akta Jualan Langsung 1993 [*Akta 500*], yang disebut “Akta ibu” dalam Akta ini, dipinda dalam tajuk panjang dengan memasukkan selepas perkataan “penjualan langsung,” perkataan “bagi larangan skim atau perkiraan piramid, skim atau perkiraan pendedaran berantai, atau apa-apa skim atau perkiraan yang serupa dengannya.”.

Pindaan tajuk ringkas

3. Akta ibu dipinda dengan menggantikan tajuk ringkas “Akta Jualan Langsung 1993” dengan tajuk ringkas “Akta Jualan Langsung dan Skim Anti-Piramid 1993”.

Sebutan mengenai Akta ibu

4. (1) Semua sebutan mengenai Akta Jualan Langsung 1993 dalam mana-mana undang-undang bertulis atau dokumen hendaklah, apabila Akta ini mula berkuat kuasa, ditafsirkan sebagai sebutan mengenai Akta Jualan Langsung dan Skim Anti-Piramid 1993.

(2) Semua sebutan mengenai Akta Jualan Langsung 1993 dalam mana-mana prosiding jenayah, sivil atau mahkamah hendaklah terus terpakai dan tidak terjejas seolah-olah ia tidak dipinda oleh Akta ini.

Pelantikan yang dibuat di bawah Akta ibu

5. Pertukaran nama yang diperuntukkan dalam seksyen 3 Akta ini tidaklah menjejaskan atau menyebabkan cacat pelantikan Pengawal Jualan Langsung, Timbalan Pengawal Jualan Langsung, Penolong Pengawal Jualan Langsung dan pegawai lain yang dibuat di bawah Akta ibu sebelum Akta ini mula berkuat kuasa.

Pindaan seksyen 2

6. Seksyen 2 Akta ibu dipinda—

(a) dengan memasukkan selepas takrif “ditetapkan” takrif yang berikut:

‘ “elektronik” ertinya teknologi yang menggunakan elektrik, optik, magnetik, elektromagnetik, biometrik, photonik atau teknologi lain yang seumpama;’

(b) dengan memasukkan selepas takrif “elektronik” takrif yang berikut:

‘ “harta” ertinya tiap-tiap perihalan harta alih atau harta tak alih, sama ada yang ketara atau tidak ketara dan termasuklah suatu kepentingan mengenai mana-

mana harta alih atau harta tak alih itu, hak dalam tindakan, surat cara boleh niaga dan wang;’;

- (c) dalam takrif “jualan langsung”, dengan menggantikan perkataan “dan jualan pesanan pos” dengan perkataan “, jualan pesanan pos atau jualan melalui transaksi elektronik”;
- (d) dengan memasukkan selepas takrif “jualan langsung” takrif yang berikut:

‘ “jualan melalui transaksi elektronik” ertinya jualan barang-barang atau perkhidmatan secara elektronik dengan menggunakan rangkaian pemasaran bagi maksud untuk mendapatkan komisen, bonus atau apa-apa faedah ekonomi yang lain’;

- (e) dalam takrif “jualan pesanan pos”, dengan memasukkan selepas perkataan “pos” perkataan “atau apa-apa kaedah penghantaran yang lain termasuk secara elektronik”; dan
- (f) dalam takrif “perkhidmatan”, dengan memasukkan selepas perkataan “barang-barang” perkataan ‘dan pelaksanaan kerja di bawah suatu kontrak perkhidmatan, dan sebutan mengenai perkataan “perkhidmatan” dalam Akta ini hendaklah berhubungan dengan jualan langsung dan skim piramid’.

Pindaan seksyen 4

7. Seksyen 4 Akta ibu dipinda—

- (a) dalam subseksyen (2), dengan memasukkan selepas perkataan “pertubuhan perbadanan,” di mana-mana jua terdapat perkataan “perkongsian atau pertubuhan,”;
- (b) dalam perenggan (2)(a)—
 - (i) dengan menggantikan perkataan “dua ratus lima puluh ribu” dengan perkataan “satu juta”; dan
 - (ii) dengan menggantikan perkataan “lima ratus ribu” dengan perkataan “dua juta”;

- (c) dalam perenggan (2)(b)—
- (i) dengan menggantikan perkataan “satu ratus ribu” dengan perkataan “dua ratus lima puluh ribu”;
 - (ii) dengan menggantikan perkataan “dua ratus lima puluh ribu” dengan perkataan “lima ratus ribu”;
 - (iii) dengan menggantikan perkataan “tiga” dengan perkataan “lima”;
 - (iv) dengan menggantikan perkataan “enam” dengan perkataan “sepuluh”; dan
- (d) dalam subseksyen (3), dengan memasukkan selepas perkataan “pertubuhan perbadanan itu,” perkataan “pekongsi dalam perkongsian itu atau pemegang jawatan dalam pertubuhan itu, mengikut mana-mana yang berkenaan.”.

Pindaan seksyen 6

8. Seksyen 6 Akta ibu dipinda dengan memasukkan selepas subseksyen (3) subseksyen yang berikut:

“(4) Mana-mana pemegang lesen yang tidak mematuhi mana-mana syarat lesen yang dikenakan oleh Pengawal di bawah subseksyen (1) melakukan suatu kesalahan.”.

Pemotongan seksyen 7

9. Akta ibu dipinda dengan memotong seksyen 7.

Pindaan seksyen 11

10. Seksyen 11 Akta ibu dipinda—

- (a) dengan memasukkan selepas subseksyen (2) subseksyen yang berikut:

“(2A) Walau apa pun subseksyen (2), jika tiada representasi dibuat oleh pemegang lesen selepas habis tempoh empat belas hari dari tarikh penyampaian notis di bawah subseksyen (1), Pengawal boleh memutuskan untuk meneruskan tindakan yang dicadangkan di bawah subseksyen (1).”; dan

(b) dalam subseksyen (3), dengan memasukkan selepas perkataan “(2)” perkataan “atau (2A)”.

Pindaan seksyen 12

11. Seksyen 12 Akta ibu dipinda dengan memasukkan selepas subseksyen (2) subseksyen yang berikut:

“(3) Walau apa pun subseksyen (1) dan (2), jika suatu lesen dibatalkan, pemegang lesen itu hendaklah menyerahkan lesennya secara penyampaian ke diri kepada Pengawal dalam masa empat belas hari dari tarikh notis bertulis itu disampaikan kepada pemegang lesen di bawah subseksyen 11(3).

(4) Mana-mana orang yang melanggar subseksyen (3) melakukan suatu kesalahan dan, apabila disabitkan, boleh—

(a) jika orang itu ialah suatu pertubuhan perbadanan, perkongsian atau pertubuhan, didenda tidak melebihi dua ratus ribu ringgit;

(b) jika orang itu bukan suatu pertubuhan perbadanan, perkongsian atau pertubuhan, didenda tidak melebihi satu ratus ribu ringgit atau dipenjarakan selama tempoh tidak melebihi enam bulan atau kedua-duanya.

(5) Jika seseorang, yang menjadi pengarah, pengurus, setiausaha atau pegawai serupa itu yang lain dalam suatu pertubuhan perbadanan, pekongsi dalam suatu perkongsian atau pemegang jawatan dalam suatu pertubuhan itu, mengikut mana-mana yang berkenaan, melakukan kesalahan di bawah seksyen ini menurut kuasa seksyen 38, dia boleh dikenakan penalti yang diperuntukkan di bawah perenggan (4)(b).”.

Pindaan Bahagian III

12. Tajuk Bahagian III Akta ibu dipinda dengan menggantikan perkataan “JUALAN PESANAN POS” dengan perkataan “,JUALAN PESANAN POS DAN JUALAN MELALUI TRANSAKSI ELEKTRONIK”.

Seksyen baru 19A

13. Akta ibu dipinda dengan memasukkan selepas seksyen 19 seksyen yang berikut:

“Jualan melalui transaksi elektronik

19A. (1) Tiada seorang pun boleh membekalkan secara jualan, atau mengiklankan untuk membekalkan, melalui transaksi elektronik, apa-apa barang-barang atau perkhidmatan kecuali mengikut Akta ini atau peraturan-peraturan.

(2) Mana-mana orang yang melanggar subseksyen (1) melakukan suatu kesalahan.”.

Bahagian baru VA

14. Akta ibu dipinda dengan memasukkan selepas “Bahagian V” Bahagian yang berikut:

“BAHAGIAN VA**LARANGAN SKIM PIRAMID****Tafsiran berhubung dengan Bahagian ini**

27A. Dalam Bahagian ini, melainkan jika konteksnya menghendaki makna yang lain—

“mempromosikan”, berhubung dengan apa-apa skim piramid yang dilarang oleh Akta ini, ertinya—

- (a) mengikhtikarkan, menyediakan, mewujudkan, merancang, mengiklankan, mengendalikan atau menjalankan dengan menggunakan apa-apa perantaraan termasuk melalui transaksi elektronik; atau
- (b) mendorong atau cuba untuk mendorong orang lain untuk menjadi peserta dalam skim itu dengan menggunakan apa-apa perantaraan, termasuk melalui transaksi elektronik;

“orang” ertinya individu, pertubuhan perbadanan, perkongsian atau pertubuhan;

“peserta” ertinya orang yang menyertai atau memperoleh faedah dalam suatu skim piramid;

“skim piramid” ertinya apa-apa skim, perkiraan, pelan, pengendalian atau proses berantai yang mempunyai semua atau mana-mana ciri yang dinyatakan dalam Jadual.

Menyalahi undang-undang untuk mempromosikan atau menjalankan skim piramid

27B. (1) Tiada seorang pun boleh mempromosikan atau menyebabkan supaya dipromosikan sesuatu skim piramid.

(2) Mana-mana orang yang melanggar subseksyen (1) melakukan suatu kesalahan dan, apabila disabitkan, boleh—

(a) jika orang itu ialah suatu pertubuhan perbadanan, perkongsian atau pertubuhan, didenda tidak kurang daripada satu juta ringgit dan tidak lebih daripada sepuluh juta ringgit dan, bagi kesalahan kali kedua atau yang berikutnya, didenda tidak kurang daripada sepuluh juta ringgit dan tidak lebih daripada lima puluh juta ringgit;

(b) jika orang itu bukan suatu pertubuhan perbadanan, perkongsian atau pertubuhan, didenda tidak kurang daripada lima ratus ribu ringgit dan tidak lebih daripada lima juta ringgit atau dipenjarakan selama tempoh tidak melebihi lima tahun atau kedua-duanya dan, bagi kesalahan kali kedua atau yang berikutnya, didenda tidak kurang daripada satu juta ringgit dan tidak lebih daripada sepuluh juta ringgit atau dipenjarakan selama tempoh tidak melebihi sepuluh tahun atau kedua-duanya.

(3) Jika seseorang, yang menjadi pengarah, pengurus, setiausaha atau pegawai serupa itu yang lain dalam suatu pertubuhan perbadanan, pekongsi dalam suatu perkongsian atau pemegang jawatan dalam suatu pertubuhan, mengikut mana-mana yang berkenaan, melakukan kesalahan di bawah seksyen ini menurut kuasa seksyen 38, dia boleh dikenakan penalti yang diperuntukkan di bawah perenggan (2)(b).”.

Pindaan seksyen 29

15. Akta ibu dipinda dengan menggantikan seksyen 29 dengan seksyen yang berikut:

“Pengeledahan dan penyitaan dengan waran

29. (1) Jika seseorang Majistret mendapati, berdasarkan maklumat bertulis atas sumpah dan selepas apa-apa siasatan yang difikirkannya perlu, bahawa terdapat sebab yang munasabah untuk mempercayai bahawa suatu kesalahan di bawah Akta ini atau peraturan-peraturan sedang atau telah dilakukan di mana-mana premis, Majistret itu boleh mengeluarkan suatu waran yang memberi kuasa mana-mana Penolong Pengawal yang dinamakan dalam waran itu untuk memasuki premis itu pada bila-bila masa yang munasabah sama ada pada waktu siang atau waktu malam, dengan atau tanpa bantuan dan jika perlu dengan kekerasan.

(2) Waran yang dikeluarkan di bawah subseksyen (1) boleh memberi kuasa Penolong Pengawal itu untuk—

- (a) menggeledah premis itu bagi, dan menyita apa-apa harta, dokumen atau data berkomputer yang dengan semunasabahnya dipercayai dapat memberikan keterangan mengenai pelakuan kesalahan itu;
- (b) mengalihkan dari premis itu apa-apa harta, dokumen atau data berkomputer yang disita di bawah perenggan (a) dan menahannya selama apa-apa tempoh yang difikirkan perlu oleh Penolong Pengawal itu;
- (c) memeriksa mana-mana orang yang berada di premis itu, jika Penolong Pengawal itu mempunyai sebab untuk mengesyaki bahawa orang itu mempunyai pada dirinya apa-apa harta, dokumen atau data berkomputer, termasuk dokumen persendirian, yang dengan semunasabahnya dipercayai dapat memberikan keterangan mengenai pelakuan kesalahan itu dan menyita harta, dokumen atau data berkomputer itu;

- (d) mengalihkan daripada orang yang diperiksa di bawah perenggan (c) harta, dokumen atau data berkomputer sedemikian yang disita di bawah perenggan itu dan menahannya selama apa-apa tempoh yang difikirkan perlu oleh Penolong Pengawal itu; dan
- (e) memeriksa, membuat salinan, atau mengambil cabutan dari, mana-mana harta, dokumen atau data berkomputer yang disita dan ditahan di bawah perenggan (b), (c) dan (d).

(3) Jika perlu untuk berbuat demikian, seseorang Penolong Pengawal boleh dalam menjalankan mana-mana kuasanya di bawah subseksyen (1)—

- (a) memecah buka mana-mana pintu mana-mana premis itu dan memasuki premis itu;
- (b) memasuki dengan menggunakan kekerasan mana-mana premis dan tiap-tiap bahagian premis itu;
- (c) memecah buka, memeriksa dan menggeledah apa-apa barang, bekas atau wadah;
- (d) mengalihkan dengan menggunakan kekerasan apa-apa halangan kepada kemasukan, penggeledahan, penyitaan, penahanan atau pengalihan yang dia diberi kuasa untuk melaksanakannya; atau
- (e) menahan mana-mana orang yang dijumpai di mana-mana premis sehingga penggeledahan itu selesai.

(4) Jika, oleh sebab jenis, saiz atau amaunnya, adalah tidak munasabah untuk mengalihkan apa-apa harta, dokumen atau data berkomputer yang disita di bawah subseksyen (1), Penolong Pengawal itu hendaklah, dengan apa-apa cara, mengelak harta, dokumen atau data berkomputer itu dalam premis atau bekas yang di dalamnya ia dijumpai.

(5) Seseorang yang, tanpa kuasa yang sah memecahkan, mengganggu atau merosakkan lak yang disebut dalam subseksyen (4) atau mengalihkan apa-apa harta, dokumen atau data berkomputer yang dilak atau cuba untuk berbuat demikian melakukan suatu kesalahan.”.

Seksyen baru 29A, 29B, 29C dan 29D

16. Akta ibu dipinda dengan memasukkan selepas seksyen 29 seksyen yang berikut:

“Pengeledahan dan penyitaan tanpa waran

29A. Jika seseorang Penolong Pengawal dalam mana-mana hal keadaan yang disebut dalam seksyen 29 mempunyai sebab yang munasabah untuk mempercayai bahawa oleh sebab kelengahan dalam memperoleh suatu waran geledah di bawah seksyen itu, penyiasatan akan terjejas atau keterangan mengenai pelakuan kesalahan mungkin diganggu, dialihkan, dirosakkan atau dimusnahkan, Penolong Pengawal itu boleh memasuki premis itu dan menjalankan dalam, di atas dan berkenaan dengan premis itu segala kuasa yang disebut dalam seksyen 29 dengan cara yang sepenuhnya dan secukupnya seolah-olah dia diberi kuasa untuk berbuat demikian oleh suatu waran yang dikeluarkan di bawah seksyen itu.

Penolong Pengawal boleh membawa orang lain

29B. Mana-mana Penolong Pengawal yang memasuki mana-mana premis menurut kuasa seksyen 29A boleh membawa bersamanya mana-mana orang lain dan apa-apa kelengkapan yang didapatinya perlu, dan apabila meninggalkan mana-mana premis yang telah dimasukinya pada menjalankan kuasanya di bawah Bahagian ini dia hendaklah, jika premis itu tidak diduduki atau jika penghuninya tiada pada masa itu, meninggalkannya selamat daripada penceroboh sebagaimana sebelum dia memasukinya.

Capaian kepada data berkomputer

29c. (1) Seseorang Penolong Pengawal yang menjalankan suatu pengeledahan di bawah Akta ini hendaklah diberi capaian kepada data berkomputer sama ada yang disimpan dalam suatu komputer atau selainnya.

(2) Bagi maksud seksyen ini, “capaian”—

(a) termasuklah diberikan kata laluan, kod penyulitan, kod penyahsulitan, perisian atau perkakasan yang

perlu dan apa-apa cara lain yang dikehendaki untuk membolehkan data berkomputer itu difahami; dan

- (b) mempunyai erti yang diberikan kepadanya oleh subseksyen 2(2) dan (5) Akta Jenayah Komputer 1997 [*Akta 563*].

Senarai benda yang disita

29D. (1) Jika apa-apa harta, dokumen atau data berkomputer disita di bawah Bahagian ini, Penolong Pengawal itu hendaklah, dengan secepat yang dapat dilaksanakan, menyediakan suatu senarai benda yang disita dan mengenai tempat di mana harta, dokumen atau data berkomputer itu masing-masing dijumpai dan menyerahkan suatu salinan senarai itu yang ditandatangani olehnya kepada penduduk premis yang telah digeledah, atau kepada ejen atau pekhidmatnya, di premis itu.

(2) Jika premis itu tidak diduduki, Penolong Pengawal itu hendaklah apabila mungkin menampalkan senarai benda yang disita itu di tempat yang mudah dilihat di premis itu.”.

Pindaan seksyen 30

17. Subseksyen 30(1) Akta ibu dipinda dengan memotong perkataan “jika orang itu enggan memberikan nama dan alamatnya atau jika ada alasan yang munasabah untuk percaya bahawa dia telah memberikan nama dan alamat palsu”.

Pindaan seksyen 31

18. Seksyen 31 Akta ibu dipinda—

- (a) dengan menggantikan subseksyen (1) dengan subseksyen yang berikut:

“(1) Mana-mana orang yang—

- (a) enggan untuk membenarkan mana-mana pegawai yang dilantik di bawah Akta ini atau orang lain yang disebut dalam seksyen 29B akses kepada mana-mana premis, atau tidak menyerahkan dirinya untuk diperiksa;

- (b) mengamang, menghalang, menggagalkan atau melengahkan atau selainnya mengganggu seseorang pegawai yang dilantik di bawah Akta ini atau orang lain yang disebut dalam seksyen 29B masuk ke dalam premis sedangkan dia berhak untuk masuk ke dalam premis itu atau dalam melaksanakan kewajipannya di bawah Bahagian ini;
- (c) tidak mematuhi apa-apa permintaan sah mana-mana pegawai yang dilantik di bawah Akta ini dalam melaksanakan kewajipannya di bawah Bahagian ini;
- (d) enggan memberi mana-mana pegawai yang dilantik di bawah Akta ini apa-apa harta, dokumen atau data berkomputer yang dikehendaki secara munasabah daripadanya dan yang dia berkuasa untuk memberikannya;
- (e) tidak menzahirkan apa-apa maklumat atau mengemukakan kepada, atau menyembunyikan atau cuba untuk menyembunyikan daripada seseorang pegawai yang dilantik di bawah Akta ini apa-apa harta, dokumen atau data berkomputer yang dikehendaki oleh pegawai itu;
- (f) mengambil balik atau berusaha untuk mengambil balik apa-apa benda yang telah disita dengan sewajarnya;
- (g) sebelum atau selepas apa-apa penggeledahan atau penyitaan, memecahkan atau selainnya memusnahkan apa-apa benda untuk menghalang penyitaannya, atau penyimpanan selamat apa-apa harta, dokumen atau data berkomputer;
- (h) tanpa kuasa yang sah, memecahkan, mengganggu atau merosakkan lak yang disebut dalam seksyen 29 atau mengalihkan apa-apa benda yang dilak atau cuba untuk berbuat demikian; atau
- (i) menghalang dalam apa jua cara mana-mana pegawai yang dilantik di bawah Akta ini dalam menjalankan tanggungjawabnya di bawah Akta ini,

melakukan suatu kesalahan dan, apabila disabitkan, boleh didenda tidak melebihi dua puluh ribu ringgit atau dipenjarakan selama tempoh tidak melebihi enam bulan atau kedua-duanya.”; dan

(b) dengan memotong subseksyen (3).

Pindaan seksyen 32

19. Seksyen 32 Akta ibu dipinda dengan menggantikan perkataan “barang-barang atau dokumen” dengan perkataan “harta, dokumen atau data berkomputer”.

Pindaan seksyen 33

20. Seksyen 33 Akta ibu dipinda—

(a) dengan menomborkan semula peruntukan yang sedia ada sebagai subseksyen (1) dan memasukkan selepas perkataan “Akta ini” perkataan “atau peraturan-peraturan”; dan

(b) dengan memasukkan selepas subseksyen (1) subseksyen yang berikut;

“(2) Seseorang Penolong Pengawal yang menyiasat pelakuan sesuatu kesalahan di bawah Akta ini atau peraturan-peraturan boleh menjalankan segala kuasa atau mana-mana kuasa berhubung dengan penyiasatan polis dalam kes kesalahan boleh tangkap yang diperuntukkan di bawah Kanun Tatacara Jenayah [*Akta 593*].”.

Seksyen baru 33A, 33B dan 33C

21. Akta ibu dipinda dengan memasukkan selepas seksyen 33 seksyen yang berikut:

“Kuasa untuk menghendaki kehadiran orang yang mempunyai pengetahuan tentang kes

33A. (1) Seseorang Penolong Pengawal yang membuat siasatan di bawah Akta ini atau peraturan-peraturan boleh, melalui notis secara bertulis, menghendaki kehadiran di hadapannya

mana-mana orang yang pada pendapat Penolong Pengawal itu mempunyai pengetahuan tentang fakta dan hal keadaan kes itu, dan orang itu hendaklah hadir sebagaimana yang dikehendaki sedemikian.

(2) Jika mana-mana orang enggan untuk hadir sebagaimana yang dikehendaki sedemikian, Penolong Pengawal itu boleh melaporkan keengganan itu kepada seorang Majistret yang hendaklah mengeluarkan suatu waran untuk memastikan kehadiran orang itu sebagaimana yang dikehendaki oleh perintah yang dibuat di bawah subseksyen (1).

Pemeriksaan orang yang mempunyai pengetahuan tentang kes

33B. (1) Seseorang Penolong Pengawal yang membuat penyiasatan di bawah Akta ini atau peraturan-peraturan boleh memeriksa secara lisan mana-mana orang yang dikatakan mempunyai pengetahuan tentang fakta dan hal keadaan kes itu dan hendaklah mengubah ke dalam bentuk bertulis apa-apa pernyataan yang dibuat oleh orang yang diperiksa sedemikian.

(2) Orang yang diperiksa di bawah subseksyen (1) adalah terikat di sisi undang-undang untuk menjawab semua soalan yang berhubungan dengan kes itu yang diajukan kepadanya oleh Penolong Pengawal, tetapi orang itu boleh enggan untuk menjawab mana-mana soalan yang jawapannya berkecenderungan mendedahkannya kepada suatu pertuduhan jenayah atau penalti atau pelucuthakan.

(3) Seseorang yang membuat suatu pernyataan di bawah seksyen ini adalah terikat di sisi undang-undang untuk menyatakan yang benar, sama ada atau tidak pernyataan itu dibuat secara keseluruhannya atau sebahagiannya dalam menjawab soalan itu.

(4) Penolong Pengawal yang memeriksa seseorang di bawah subseksyen (1) hendaklah terlebih dahulu memaklumkan orang itu mengenai peruntukan subseksyen (2) dan (3).

(5) Sesuatu pernyataan yang dibuat oleh mana-mana orang di bawah seksyen ini hendaklah, apabila mungkin, diubahkan ke dalam bentuk bertulis dan ditandatangani oleh orang yang membuatnya atau dilekatkan dengan cap ibu jarinya, mengikut mana-mana yang berkenaan, selepas—

- (a) pernyataan itu dibacakan kepadanya dalam bahasa dia membuatnya; dan
- (b) dia diberi peluang untuk membuat apa-apa pembetulan yang dia mahu.

Kebolehterimaan pernyataan sebagai keterangan

33c. (1) Kecuali sebagaimana yang diperuntukkan dalam seksyen ini, tiada pernyataan yang dibuat oleh mana-mana orang kepada seorang Penolong Pengawal dalam perjalanan suatu penyiasatan yang dibuat di bawah Akta ini atau peraturan-peraturan boleh digunakan sebagai keterangan.

(2) Apabila mana-mana saksi dipanggil bagi pihak pendakwaan atau pembelaan, selain tertuduh, mahkamah hendaklah, atas permintaan tertuduh atau pendakwa, merujuk kepada mana-mana pernyataan yang dibuat oleh saksi itu kepada Penolong Pengawal dalam perjalanan penyiasatan di bawah Akta ini atau peraturan-peraturan dan boleh kemudiannya, jika difikirkan patut oleh mahkamah demi kepentingan keadilan, mengarahkan supaya tertuduh diberi suatu salinan pernyataan itu dan pernyataan itu boleh digunakan untuk mencabar kebolehpercayaan saksi itu mengikut cara yang diperuntukkan oleh Akta Keterangan 1950 [*Akta 56*].

(3) Jika tertuduh telah membuat suatu pernyataan semasa perjalanan suatu penyiasatan, pernyataan itu boleh diterima sebagai keterangan untuk menyokong pembelaannya semasa perjalanan perbicaraan.

(4) Tiada apa jua dalam seksyen ini boleh disifatkan terpakai bagi apa-apa pernyataan yang dibuat dalam perjalanan perbarisan cam atau yang diliputi oleh seksyen 27 atau perenggan 32(1)(a), (i) dan (j) Akta Keterangan 1950.

(5) Apabila mana-mana orang dipertuduh atas mana-mana kesalahan yang berhubungan dengan—

(a) pembuatan; atau

(b) kandungan,

apa-apa pernyataan yang dibuat olehnya kepada seorang Penolong Pengawal dalam perjalanan suatu penyiasatan yang dibuat di bawah Akta ini atau peraturan-peraturan, pernyataan itu boleh digunakan sebagai keterangan dalam kes pihak pendakwa.”.

Penggantian seksyen 34

22. (1) Akta ibu dipinda dengan menggantikan seksyen 34 dengan seksyen yang berikut:

“Pendakwaan

34. Tiada pendakwaan bagi atau berhubungan dengan mana-mana kesalahan di bawah Akta ini atau peraturan-peraturan boleh dimulakan kecuali oleh atau dengan keizinan bertulis Pendakwa Raya.”.

(2) Pindaan dalam subseksyen (1) tidaklah menjejaskan mana-mana prosiding jenayah atau sivil yang belum selesai dalam mana-mana mahkamah.

Pindaan seksyen 35

23. Seksyen 35 Akta ibu dipinda—

(a) dengan menggantikan nota bahu yang sedia ada dengan nota bahu yang berikut:

“Pelucuthakan harta, dsb.”;

(b) dalam subseksyen (1), (2), (3), (4) dan (6), dengan menggantikan perkataan “barang-barang” di mana-mana jua terdapat dengan perkataan “harta, dokumen atau data berkomputer”; dan

- (c) dengan menggantikan subseksyen (5) dengan subseksyen yang berikut:

“(5) Apabila notis yang disebut dalam subseksyen (4) diterima, Penolong Pengawal hendaklah merujuk notis itu kepada Pengawal atau Timbalan Pengawal, yang boleh, selepas apa-apa siasatan yang perlu, mengarahkan supaya harta, dokumen atau data berkomputer itu dilepaskan atau dilucuthakkan atau merujuk perkara itu kepada Majistret bagi mendapatkan keputusannya.”.

Pindaan seksyen 36

24. Seksyen 36 Akta ibu dipinda dengan menggantikan perkataan “barang-barang” dengan perkataan “harta, dokumen atau data berkomputer”.

Seksyen baru 36A

25. Akta ibu dipinda dengan memasukkan selepas seksyen 36 seksyen yang berikut:

“Kos memegang harta, dsb., yang disita

36A. Jika apa-apa harta, dokumen atau data berkomputer yang disita dalam menjalankan mana-mana kuasa di bawah Akta ini dipegang dalam jagaan Kerajaan sementara menunggu penyelesaian apa-apa prosiding berkenaan dengan suatu kesalahan di bawah Akta ini atau peraturan-peraturan, kos bagi memegang harta, dokumen atau data berkomputer itu dalam jagaan itu hendaklah, sekiranya mana-mana orang didapati bersalah atas suatu kesalahan di bawah Akta ini atau peraturan-peraturan, menjadi hutang yang kena dibayar kepada Kerajaan oleh orang itu dan hendaklah didapatkan dengan sewajarnya.”.

Pindaan seksyen 38

26. Seksyen 38 Akta ibu dipinda—

- (a) dengan menggantikan nota bahu yang sedia ada dengan nota bahu yang berikut:

“Kesalahan oleh pertubuhan perbadanan, dsb.”; dan

(b) dalam subseksyen (1)—

- (i) dengan memasukkan selepas perkataan “pertubuhan perbadanan” di mana-mana jua terdapat perkataan “, perkongsian atau pertubuhan”; dan
- (ii) dengan memasukkan selepas perkataan “pegawai serupa itu yang lain dalam pertubuhan perbadanan itu” perkataan “, pekongsi dalam perkongsian itu atau pemegang jawatan dalam pertubuhan itu, mengikut mana-mana yang berkenaan,”.

Pindaan seksyen 39

27. Seksyen 39 Akta ibu dipinda—

(a) dalam subseksyen (1)—

- (i) dengan menggantikan perkataan “dua puluh lima ribu” dengan perkataan “satu ratus ribu”; dan
- (ii) dengan menggantikan perkataan “lima puluh ribu” dengan perkataan “dua ratus lima puluh ribu”;

(b) dalam subseksyen (2)—

- (i) dengan memasukkan selepas perkataan “pertubuhan perbadanan” perkataan “, perkongsian atau pertubuhan”;
- (ii) dengan menggantikan perkataan “satu ratus ribu” dengan perkataan “dua ratus lima puluh ribu”; dan
- (iii) dengan menggantikan perkataan “dua ratus lima puluh ribu ” dengan perkataan “lima ratus ribu”; dan

(c) dalam subseksyen (3), dengan memasukkan selepas perkataan “sesuatu pertubuhan perbadanan” perkataan “, pekongsi dalam sesuatu perkongsian atau pemegang jawatan dalam sesuatu pertubuhan, mengikut mana-mana yang berkenaan,”.

Pindaan seksyen 41

28. Seksyen 41 Akta ibu dipinda dengan menggantikan perkataan “mahkamah Majistret Kelas Pertama” dengan perkataan “mahkamah Sesyen”.

Pindaan seksyen 42

29. Seksyen 42 Akta ibu dipinda dalam perenggan (1)(b), dengan menggantikan perkataan “orang cacat” dengan perkataan “orang kurang upaya”.

Seksyen baru 43A

30. Akta ibu dipinda dengan memasukkan selepas seksyen 43 seksyen yang berikut:

“Perlindungan kepada pemberi maklumat

43A. (1) Kecuali sebagaimana yang diperuntukkan dalam seksyen ini, tiada saksi dalam apa-apa prosiding sivil atau jenayah boleh dikehendaki atau dibenarkan untuk menzahirkan nama atau alamat mana-mana pemberi maklumat atau isi maklumat dan jenis maklumat yang diterima daripadanya atau menyatakan apa-apa perkara yang mungkin menyebabkan pemberi maklumat diketahui.

(2) Jika apa-apa harta, dokumen atau data berkomputer yang menjadi keterangan atau yang boleh diperiksa dalam apa-apa prosiding sivil atau jenayah mengandungi apa-apa catatan yang dalamnya mana-mana pemberi maklumat dinamakan atau diperihalkan atau yang mungkin menyebabkan pemberi maklumat diketahui, mahkamah hendaklah menyebabkan supaya semua catatan sedemikian ditutup daripada penglihatan atau dipadamkan setakat yang perlu untuk melindungi pemberi maklumat daripada diketahui.

(3) Jika dalam suatu perbicaraan bagi apa-apa kesalahan di bawah Akta ini atau peraturan-peraturan, mahkamah selepas menjalankan siasatan penuh tentang kes itu mempercayai bahawa pemberi maklumat itu dengan sengaja membuat dalam aduannya suatu pernyataan material yang dia tahu atau

percaya adalah palsu atau tidak percaya adalah benar, atau jika dalam apa-apa prosiding lain mahkamah berpendapat bahawa keadilan tidak dapat dilakukan sepenuhnya antara pihak-pihak kepada prosiding itu tanpa mengetahui pemberi maklumat, mahkamah boleh menghendaki pengemukakan aduan asal, jika dalam bentuk bertulis, dan membenarkan siasatan dan menghendaki penzahiran yang sepenuhnya berkenaan dengan pemberi maklumat.”.

Seksyen baru 45

31. Akta ibu dipinda dengan memasukkan selepas seksyen 44 seksyen yang berikut:

“Pindaan Jadual

45. Menteri boleh, melalui perintah yang disiarkan dalam *Warta*, meminda Jadual.”.

Jadual baru

32. Akta ibu dipinda dengan memasukkan selepas seksyen 45 Jadual yang berikut:

“JADUAL

CIRI-CIRI SKIM ATAU PERKIRAAN PIRAMID

[Seksyen 27A]

1. Promosi sesuatu skim atau pembayaran bonus atau faedah lain adalah semata-mata atau terutamanya melalui perekrutan atau pengenalan peserta ke dalam skim, pelan, pengendalian atau proses berantai piramid berbanding dengan jualan barang-barang, perkhidmatan atau harta tidak ketara oleh peserta.
2. Bonus dibayar kepada peserta atau mana-mana faedah lain diterima oleh peserta semata-mata atau terutamanya melalui perekrutan atau pengenalan orang lain ke dalam skim, pelan, pengendalian atau proses berantai piramid berbanding dengan jualan barang-barang, perkhidmatan atau harta tidak ketara oleh peserta atau orang lain.
3. Suatu kontrak bertulis atau pernyataan yang memperihalkan terma material perjanjian tidak disediakan kepada peserta yang menyertai skim, pelan, pengendalian atau proses berantai piramid.

4. Pembelian wajib barang-barang, perkhidmatan atau harta tidak ketara atau bayaran minimum atau kehendak jualan dikenakan sebagai syarat untuk memenuhi kehendak kelayakan atau kehendak permulaan bagi penyertaan atau pembayaran bonus atau faedah lain dalam skim, pelan, pengendalian atau proses berantai piramid.
5. Peserta dikehendaki untuk membeli barang-barang, perkhidmatan atau harta tidak ketara dalam amaun yang tidak munasabah yang melebihi jangkaan untuk dijual semula atau dibeli dalam suatu tempoh masa yang munasabah. Peserta tidak diberi kebebasan sepenuhnya dalam pembelian tetapi mereka didesak untuk membeli pakej barang-barang terpilih untuk memenuhi kehendak jualan untuk melayakkan mereka mendapat kedudukan atau bonus dalam skim, pelan, pengendalian atau proses berantai piramid.
6. Dasar bayar balik bagi barang-barang, perkhidmatan atau harta tidak ketara yang dibeli oleh peserta atau pengguna tidak disediakan.
7. Dasar beli balik oleh pengendali skim, pelan, pengendalian atau proses berantai piramid bagi barang-barang, perkhidmatan atau harta tidak ketara yang boleh dipasarkan pada masa ini atas permintaan peserta dalam terma atau perjanjian yang munasabah tidak dibenarkan atau disediakan.
8. Kehendak struktur skim, pelan, pengendalian atau proses berantai piramid yang ketat atau tidak munasabah bagi kelayakan peserta untuk dibayar bonus atau faedah lain.
9. Pengunduran diri oleh peserta daripada skim, pelan, pengendalian atau proses berantai piramid tidak dibenarkan.
10. Peserta dibenarkan atau digalakkan untuk membeli lebih daripada satu kedudukan atau hak untuk menyertai skim, pelan, pengendalian atau proses berantai piramid.

Huraian 1 - Sebutan mengenai perkataan “bonus atau faedah lain” adalah berhubungan dengan balasan atau keuntungan yang diperoleh daripada suatu skim, pelan, pengendalian atau proses berantai piramid.

Huraian 2 - Sebutan mengenai perkataan “terma material” termasuklah dasar beli balik, tempoh bertenang, waranti dan dasar bayar balik.

Huraian 3 - Barang-barang atau perkhidmatan tidak boleh dianggap boleh dipasarkan pada masa ini dan tidak tertakluk kepada ciri-ciri yang dinyatakan jika barang-barang atau perkhidmatan itu bermusim, dihentikan atau ialah barang promosi khas yang dizahirkan kepada peserta pada masa jualan.”.

HURAIAN

Rang Undang-Undang ini bertujuan untuk meminda Akta Jualan Langsung 1993 (“Akta 500”).

2. *Fasal 1* mengandungi tajuk ringkas dan kuasa Menteri untuk menetapkan tarikh permulaan kuat kuasa Akta yang dicadangkan.
3. *Fasal 2* bertujuan untuk meminda tajuk panjang Akta 500 untuk memperluas ruang lingkup Akta 500 bagi larangan skim atau perkiraan piramid.
4. *Fasal 3* bertujuan untuk meminda subseksyen 1(1) Akta 500 untuk meminda tajuk ringkas Akta 500. Selepas ini, Akta itu hendaklah dikenali sebagai “Akta Jualan Langsung dan Skim Anti-Piramid 1993”.
5. *Fasal 4* bertujuan untuk memperuntukkan bahawa apa-apa sebutan mengenai “Akta Jualan Langsung 1993” dalam mana-mana undang-undang bertulis atau dokumen, selepas Akta yang dicadangkan ini mula berkuat kuasa, ditafsirkan sebagai sebutan mengenai “Akta Jualan Langsung dan Skim Anti-Piramid 1993”. Walau bagaimanapun, apa-apa sebutan mengenai “Akta Jualan Langsung 1993” dalam mana-mana prosiding jenayah, sivil atau mahkamah hendaklah terus terpakai dan tidak terjejas seolah-olah ia tidak dipinda oleh Akta ini.
6. *Fasal 5* bertujuan untuk menjelaskan bahawa pertukaran nama Akta 500 tidak menjejaskan pelantikan Pengawal Jualan Langsung dan pegawai lain di bawah Akta Jualan Langsung 1993 sebelum Akta ini mula berkuat kuasa.
7. *Fasal 6* bertujuan untuk meminda seksyen 2 Akta 500 untuk memasukkan takrif baru dan untuk meminda takrif sedia ada yang digunakan dalam Akta untuk memasukkan jualan langsung dan skim piramid secara elektronik.
8. *Fasal 7* bertujuan untuk meminda seksyen 4 Akta 500 untuk memasukkan kesalahan oleh perkongsian dan pertubuhan dan menaikkan jumlah penalti bagi kesalahan di bawah Akta ini.
9. *Fasal 8* bertujuan untuk meminda seksyen 6 dengan menjadikan suatu kesalahan bagi mana-mana pemegang lesen yang tidak mematuhi mana-mana syarat lesen di bawah Akta 500.
10. *Fasal 9* bertujuan untuk memotong seksyen 7 Akta 500. Seksyen 7 memperuntukkan sejenis perniagaan jualan langsung yang berkenaannya lesen yang tidak boleh dikeluarkan iaitu skim piramid. Kemasukan *fasal 14* yang dicadangkan menjadikan peruntukan ini tidak lagi perlu.
11. *Fasal 10* bertujuan untuk meminda seksyen 11 bagi membolehkan Pengawal memutuskan untuk meneruskan tindakan yang dicadangkan di bawah subseksyen 11(1) Akta 500 jika pemegang lesen tidak membuat representasi selepas habis tempoh empat belas hari dari tarikh notis disampaikan kepada pemegang lesen di bawah subseksyen 11(1) Akta 500.

12. *Fasal 11* bertujuan untuk meminda seksyen 12 Akta 500 untuk menghendaki pemegang lesen menyerahkan lesennya secara penyampaian ke diri apabila lesen itu dibatalkan atau perniagaannya dihentikan dalam masa dua minggu dari tarikh notis disampaikan kepada pemegang lesen di bawah subseksyen 11(3) Akta 500.

13. *Fasal-fasal 12 dan 13* bertujuan untuk memasukkan seksyen baru iaitu seksyen 19A bagi mengawal selia jualan melalui transaksi elektronik.

14. *Fasal 14* bertujuan untuk memasukkan suatu Bahagian baru, iaitu Bahagian VA yang mengandungi seksyen 27A hingga 27B ke dalam Akta 500. Peruntukan yang dicadangkan itu memperkatakan perkara yang berhubungan dengan skim piramid, proses berantai atau skim atau perkiraan lain yang seumpamanya.

15. *Fasal 15* bertujuan untuk menggantikan seksyen 29 Akta 500 untuk memperkatakan tentang pengeledahan dan penyitaan dengan waran.

16. *Fasal 16* bertujuan untuk memasukkan seksyen baru 29A, 29B, 29C dan 29D ke dalam Akta 500. Seksyen baru 29A, 29B, dan 29C masing-masing mengadakan peruntukan untuk memberi seseorang Penolong Pengawal kuasa untuk mengeledah dan menyita tanpa waran, membenarkan Penolong Pengawal itu membawa bersamanya orang lain untuk masuk mana-mana premis dan mengakses data berkomputer. Seksyen baru 29D bertujuan untuk menghendaki Penolong Pengawal itu menyediakan senarai benda yang disita.

17. *Fasal 17* bertujuan untuk meminda seksyen 30 Akta 500 untuk memberi Penolong Pengawal kuasa untuk menahan tanpa waran mana-mana orang yang dipercayainya telah melakukan suatu kesalahan di bawah Akta 500.

18. *Fasal 18* bertujuan untuk menggantikan seksyen 31 Akta 500 untuk menjadikan suatu kesalahan bagi mana-mana orang yang menghalang pelaksanaan kuasa oleh seseorang pegawai.

19. *Fasal 19* bertujuan untuk meminda seksyen 32 Akta 500 untuk memasukkan apa-apa harta dan data berkomputer yang disita dengan waran adalah sah dan boleh diterima sebagai keterangan walau apa pun kecacatan, kesilapan atau ketinggalan di dalamnya.

20. *Fasal 20* bertujuan untuk meminda seksyen 33 Akta 500 untuk memperuntukkan kuasa penyiasatan kepada Penolong Pengawal.

21. *Fasal 21* bertujuan untuk memasukkan seksyen baru 33A, 33B dan 33C ke dalam Akta 500. Seksyen baru 33A membenarkan seorang Penolong Pengawal untuk mengarahkan kehadiran orang yang mempunyai pengetahuan tentang kes yang disiasat. Seksyen baru 33B memberi Penolong Pengawal kuasa untuk memeriksa secara lisan mana-mana orang yang mempunyai pengetahuan tentang fakta dan hal keadaan kes itu dan seksyen baru 33C memperkatakan tentang kebolehterimaan pernyataan sebagai keterangan.

22. *Fasal 22* bertujuan untuk menggantikan seksyen 34 Akta 500 tentang pendakwaan.

23. *Fasal 23* bertujuan untuk meminda seksyen 35 Akta 500 untuk menghendaki Penolong Pengawal untuk merujuk notis tuntutan oleh pemunya harta, dokumen atau data berkomputer yang disita kepada Pengawal atau Timbalan Pengawal sebelum mengarahkannya supaya dilepaskan atau dilucuthakkan atau merujukkan perkara itu kepada Majistret bagi mendapatkan keputusan.

24. *Fasal 24* bertujuan untuk meminda seksyen 36 Akta 500 untuk memasukkan harta, dokumen atau data berkomputer berkenaan dengannya tiada kos atau ganti rugi yang berbangkit daripada mana-mana penyitaannya boleh didapatkan semula dalam apa-apa prosiding melainkan jika penyitaan itu dibuat tanpa sebab yang munasabah.

25. *Fasal 25* bertujuan untuk memasukkan seksyen baru 36A ke dalam Akta 500 untuk memperuntukkan bahawa kos bagi memegang apa-apa benda yang disita dan dipegang dalam jagaan Kerajaan menjadi hutang yang kena dibayar kepada Kerajaan dan boleh didapatkan dengan sewajarnya jika orang itu didapati bersalah.

26. *Fasal 26* bertujuan untuk meminda seksyen 38 Akta 500 untuk memasukkan kesalahan oleh perkongsian dan pertubuhan.

27. *Fasal 27* bertujuan untuk meminda seksyen 39 Akta 500 untuk memasukkan penalti am bagi perkongsian dan pertubuhan dan menaikkan jumlah penalti am bagi kesalahan yang dilakukan di bawah Akta 500.

28. *Fasal 28* bertujuan untuk meminda seksyen 41 Akta 500 bagi memperluas bidang kuasa mahkamah untuk membicarakan kesalahan daripada Mahkamah Majistret kepada Mahkamah Sesyen.

29. *Fasal 29* bertujuan untuk meminda seksyen 42 dengan menggantikan perkataan “orang cacat” dengan perkataan “orang kurang upaya”.

30. *Fasal 30* bertujuan untuk memasukkan seksyen baru 43A ke dalam Akta 500 berkenaan dengan perlindungan kepada pemberi maklumat.

31. *Fasal 31* bertujuan untuk memasukkan seksyen baru 45 ke dalam Akta 500 untuk memberi Menteri kuasa meminda Jadual melalui perintah yang disiarkan dalam *Warta*.

32. *Fasal 32* bertujuan untuk memasukkan Jadual ke dalam Akta 500 untuk memberi ilustrasi ciri-ciri skim atau perkiraan piramid.

IMPLIKASI KEWANGAN

Rang Undang-Undang ini tidak akan melibatkan Kerajaan dalam apa-apa perbelanjaan wang tambahan.

[PN(U²)2447]